

## Մրցույթների տարի է



Երիտասարդների ներառումը՝ պարտադիր պայման

Թերահավատություն միշտ էլ եղել է: Միայն թե հիմա ինչ-որ չափով մեղմացել է: Խոսքը գիտության ոլորտում անցկացվող մրցույթների վերաբերյալ հասարակության որոշակի խմբերի վերաբերմունքի մասին է: Վերաբերմունքի, ինչ-որ իմաստով դրական փոփոխությունը ՀՀ ԿԳՆ գիտության պետական կոմիտեի նախագահ Սամվել Հարությունյանը պայմանավորում է անկախ փորձագիտական համակարգով: Երեկ հրավիրված ասուլիսի ժամանակ ասաց, որ այդ համակարգով Հայաստանը ԱՊՀ-ում առաջատար երկիր է համարվում: Կան պետություններ, որոնք այդ նախաձեռնությունն անգամ ուզում են գնել: Անկախ փորձագետների բազայի 1500 փորձագետ բավարարում է որոշակի չափանիշների: Նրանց մի մասը արտասահմանցի գիտնականներ են: Եվ այդ դեպքում գրեթե բացառվում է խնամի, ծանոթ կամ բարեկամ մեթոդի «կիրառումը»: Բանն այն է, որ մրցույթի ծրագրերն ուղարկվում են նաև նրանց: Փորձագետների դեմքը ոչ ոք չի տեսնում: Ամեն ինչ արվում է օն-լայն: Սամվել Հարությունյանի համոզմամբ՝ ծրագրերն արտասահման ուղարկելը մեծացնում է օբյեկտիվության աստիճանը. «Նախորդ մրցույթների ժամանակ որոշ փորձագետներ կարգը չեն պահպանել: Նրանց ազգանունները հանվել են փորձագիտական բազայից»: Ու, չնայած դրան, մրցույթները շարունակում են հաջող ընթանալ: Ավելին՝ դրանց թիվը աստիճանաբար աճում է: Այսպես, ԳՊԿ-ն 2013թ. առաջին կիսամյակում հայտարարել է ներպետական եւ միջազգային 9 մրցույթ: Մինչև տարեվերջ նախատեսվում է եւս 2-ը: Ի դեպ՝ բոլոր մրցույթներում պարտադիր պայման է՝ խմբում ընդգրկել մինչև 35 տարեկան առնվազն մեկ գիտաշխատողի՝ կամ ասպիրանտի, կամ մագիստրոսի: ԳՊԿ-ի նախագահը տեղեկացրեց նաև, որ ամփոփվել են 2011-2013թթ. գիտական եւ գիտատեխնիկական գործունեության պայմանագրային (թեմատիկ) ֆինանսավորմամբ իրականացված գիտական թեմաների հաշվետվությունները: Ծրագրերի ֆինանսավորմանը հատկացվել է 1.580.283.700 դրամ: «Ներկայումս գիտության կոմիտեն միաժամանակ հայտարարել է 4 մրցույթ՝ 3 միջազգային, եւ 1 ներպետական»,—ասաց Հարությունյանը՝ ընդգծելով, որ այդ մրցույթների թվում նաև ԼՂՀ կրթության եւ գիտության նախարարության հետ համատեղ իրականացվող մրցույթն է՝ «Արցախի գիտաշխատողների հետազոտությունների աջակցության ծրագիր-2013»-ը: Մրցույթի արդյունքում մինչև 2 տարի տեւողությամբ դրամաշնորհներ կտրամադրվեն 3-4 անձից բաղկացած գիտահետազոտական խմբերի: Դրանցում գիտական խորհրդատուն պետք է լինի ՀՀ մշտական բնակիչ: Խմբի մյուս անդամներն էլ պետք է լինեն ԼՂՀ մշտական բնակիչներ եւ դրամաշնորհի իրականացման ընթացքում բնակվեն այնտեղ: Հուլիսի 13-ին էլ հայտարարվել է կիրառական արդյունքի ձեռքբերմանն ուղղված գիտական թեմաների հայտերի ընտրության մրցույթ: Մինչև 16 ամիս ժամկետով առավելագույնը 25

միլիոն դրամ կազմող դրամաշնորհները տրվելու են համաֆինանսավորման սկզբունքով՝ գիտության բոլոր բնագավառների մասնագիտություններով կիրառական արդյունքի ձեռքբերմանն ուղղված գիտական եւ գիտատեխնիկական հետազոտությունների իրականացման համար՝ 5-7 անձից բաղկացած հետազոտական խմբերի: Ասուլիսի ժամանակ նշվեց, որ համաֆինանսավորող կարող է հանդիսանալ հայաստանյան կամ օտարերկրյա իրավաբանական անձը, որը կհամաֆինանսավորի նախագծի ընդհանուր արժեքի առնվազն 25%-ը:

Այսպիսով, ամփոփելով այս տարվա գիտական ծրագրերի մրցույթների առաջին կիսամյակը, Ս. Հարությունյանը 2013-ը հայտարարեց մրցույթների տարի:

### **Հայաստանի դիրքերը գիտության ոլորտում կփոփոխվեն**

Տարբեր գնահատականներով «Քենդլը» 15 մլն եվրո արժողությամբ ծրագիր է: ՀՀ -ի մասնաբաժինը մոտ 300 մլն դրամ է: Մնացած գումարը սարքավորումների տեսքով ստացել ենք Գերմանիայից եւ Շվեյցարիայից: «Կարելի է ասել՝ սա մեր գործընկերների կողմից նվեր է Հայաստանին: Եվրաինտեգրման շրջանակներում գիտության ոլորտում նման համագործակցությունը կարելի է համարել օրինակելի: Դա ցույց տվեց, որ մեր գիտնականները Եվրոպայում բարձր վարկանիշ ունեն, եւ մեզ հետ հաճույքով աշխատում են», — վստահեցրեց ԳՊԿ-ի նախագահը:

Իսկ աշխատանքների հաջող ընթացքի դեպքում, Հարությունյանը կարծում է, որ մոտավորապես 3 տարի հետո կունենանք նոր արագացուցչային համալիր: Եվ դա մեր տարածաշրջանում կլինի եզակի: Իսկ Հայաստանը կհայտնվի այն պետությունների շարքում, որոնք աշխարհում հայտնի են որպես բարձր գիտական մակարդակ ունեցող երկրներ:

Բուն «Քենդլ» կենտրոնի շինարարական աշխատանքները նախատեսվում է սկսել 2013 թվականի վերջին՝ ՀՀ կառավարության կողմից համապատասխան հողատկացումից հետո:

**Թամարա Մուրադյան**